

編號 1 號

【野蓮鳥】李宜諭原作

熱天个美濃湖，湖面就像大大个鏡仔，日頭下發光个水波瞞啊瞞仔，鏡仔裡背有層層疊疊个山崗、青溜溜个樹仔、闊野野个天、白雪雪个雲……。這時節，一陣野蓮鳥低低飛過湖面。

熱天係野蓮鳥个繁殖期，佢兜會變到特別靚哦！該鳥毛當打眼，全身有一跡一跡金黃色、咖啡色、白色摻烏色个毛。佢个腳長長，腳趾乜長長細細支，佢兜當好行在浮水面个葉仔頂，所以，在濫泥地大概都會看著佢兜个身影。野蓮鳥个本名安到「水雉」，因為佢兜行路个樣式當優雅，長長个尾還會撲啊撲仔，實在靚，所以，大家乜會喊佢兜「凌波仙子」。

在水陸交接个濫泥地會有當多野生个動物摻植物。尤其有兜罕得看著个野生雞仔、鴨仔、雁仔，佢兜愛生養下一代抑係徙寶，都定著愛在濫泥地，所以，又有人摻濫泥地喊做「鳥類樂園」；佢還係地球个腰仔喲，有一等強个生態淨化功能。毋過，這下濫泥地都漸漸仔毋見忒咧，加勝田肚个用藥忒重，當多生態都破壞了了，盡多鳥仔、蟲仔、蛎仔都死淨淨，甚至絕種咧，水雉乜係面臨共樣个命運。

恁多年來，保育團體摻美濃湖个野蓮農共下營造友善生態環境，錫來水雉在這作寶生養下一代，漸漸仔野蓮田就有多樣个自然生態，水雉乜換名安到「野蓮鳥」，變成美濃湖个觀光特色之一咧。

其實，原旦野蓮農當惱水鳥仔，逐擺正種啊著个野蓮苗畝生根，水鳥就會來背，背死忒就愛補種，加盡無閒，野蓮農就會想辦法摻佢兜追走。再過來就係野蓮種下去 50 日，葉仔較撈實壯旺咧，水雉就會在葉仔頂作寶，毋過，20 日過後野蓮就愛收成咧，恁堵好又乜係水雉生卵孵子个時節，愛仰結煞正好？野蓮係無去採收，就會昶老賣毋出去，係去採收，水雉孵子就會失敗，實在兩難。

好得有農民願意退一步，野蓮鳥孵卵地方个野蓮就無採收，留分佢兜繼續孵子繁殖。因為大家共同合作，營造一隻友善環境分野蓮鳥做得永久在這生活，這下美濃湖裡背个生態緊來緊豐富咧。

編號 2 號

【攀樹】徐姿華原作

六月初，學校安排僮兜體驗「攀樹」，請來當有經驗个教練團教僮兜爬樹。在活動該日，大家都當期待，先生帶等興蹠蹠¹个僮兜來到集合地點，教練先講解規則摻注意事項，逐儕目金金、耳角角仔聽到當入文，摻平常時上課昏哆昏哆²个樣仔爭盡多。

續下來，教練教僮兜著護具、戴手袋仔摻安全帽，帶僮兜去到學校該頭百過年个大榕樹下。其他个教練既經先準備好勢，摻當多定滑輪並索仔固定在樹頂，這斯係僮兜愛攀樹个工具。攀樹摻爬樹無共樣，攀樹係運用攀樹索、吊帶、鉤環、踏索這兜，手腳搵動出力，撐起軀身一步一步攀往上；教練講解並示範過後，愛換僮兜上場咧。

正起勢，逐儕都驚驚仔毋敢佷兼去，大膽个阿智好擲擲仔³搶先愛攀，體育股長阿宏也行前去。教練口頭指導，佢兜當順序慢慢緊攀緊高，攀到離地 4 公尺恁高个時節，還笑咪咪翕相留念；佢兜過繼續緊攀往上，直直到教練設个目標 8 公尺高該位，拿著

「攀樹證書」正坐落樹梗杓一下；佢兩儕在樹頂當歡喜，緊喊僮兜遽遽攀，講樹頂當好搞。

僮攀樹該時當緊張，手腳摻動作搵毋著，索仔拉到歪歪斜斜，一下撞著樹、一下晃到碰著同學。阿芬也無較慶，索仔拉到挨挨轉，硬硬會打結。一時節，樹頂、樹下有人笑到哈哈滾；有人驚到腳底撓撓緊嗽眊，非常鬧熱。當無簡單，僮攀到 5 公尺高咧，手軟腳犁想愛停下來，在樹頂个教練斯搵手分僮坐在樹梗町歇睏。僮扶等樹樑緊敲大氣，涼風吹來摻頭先个煩躁、緊張吹毋見忒；對樹頂看出去遠遠个所在，闊野野、黃恁恁个田摻青山襯等藍天白雲，正經分人心情鬆爽。

好點點一列紅色間等白色个普悠瑪號火車對田脣颯啊過，「哇！火車！」樹頂个同學做下大聲嘶，還在樹下个同學斯脰有⁴看往上，等毋得著好遽遽攀上樹頂共下杓。

這擺攀樹，有人驚高、有人毋敢謙⁵上樹樑，驚該旨踏著樹樑、無把扼个感覺。毋過，經過教練、同學个搵手摻鼓勵，逐儕都學會信付、承擔、合作摻勇敢；也分僮兜知得面對困難莫跂跂⁶、總愛膽在在去克服，身邊定著會有人肯摻佢搵手啦！

¹ 興蹠蹠：音 himˋ diaˋ diaˋ；興匆匆的。

² 昏哆昏哆：音 fun de fun de；非天生因素造成的頭昏腦脹。

³ 好擲擲仔：音 hauˋ ziedˋ ziedˋ er；興沖沖的樣子。

⁴ 脰有：音 goiˋ rhog rhog er；羨慕得流口水的樣子。

⁵ 謙：音 kiam+；跨越。

⁶ 跂跂忸忸：音 giuˋ giuˋ niuˋ niuˋ；畏縮怕羞的樣子。

編號 4 號

【屋下个燕仔】曾俊鑾原作

又到燕仔轉來臺灣个季節咧，逐位都聽得著嘖嘖啾啾个叫聲。

十五年前，老屋飛來一對燕仔，該年降三寶，頭寶無出子，第二寶嘅有一隻白色个燕仔。

聽講，頭擺人想愛證明燕仔明年會轉寶無，斯在燕仔个腳町綑一細截紅線。佢屋下毋使恁麻煩，因為連續八年，最少有一隻白雪雪个鳥子孵出來，最多个係一寶三隻。這係「白化症」，生來就有个遺傳病，本成就盡罕得看著，毋知係鳥公抑係鳥嫲摺這種基因傳分後代？

鳥子一出世，鳥公、鳥嫲日時頭總係無閒直掣，飛往出飛往入，啣等細蟲仔飼鳥子，烏白不管，逐隻都有分。當像飼毋飽樣，鳥公、鳥嫲一飛兼，鳥子个背就掣到大嫲隻。到暗晡頭，一隻在鳥寶掌等，另外一隻就在無幾遠个門鈴頂背歇睏。來幾輪過後，屋下人就喊佢兜係「屋下个燕仔」。

鳥公、鳥嫲逐年二月中轉來，時間差毋多會到咧，屋下人斯會頭臥臥仔緊望；到十月佢兜就跔等北風下南，闊闊个天時坪一

眨目又變到冷冷落落。佢兜毋識共下轉屋，會所爭兩三日，逐擺重逢，幾暢你就毋知！嘖嘖啾啾鬧熱煎煎，樹尾、花園、天頂都係佢兜活跳毳翼¹个形影，續下來就看佢兜聯合起來逐走屋簷鳥，因為佢兜下南个時節，寶會分屋簷鳥號走。佢摺屋下人長透坐在交椅頂，看佢兜整寶、絡食、唸嘴、孵卵、飼鳥子，摺一寶過一寶正學會飛个鳥子送走，反反覆覆，一年過一年。

毋過，天下無不散个筵席，臺灣、南洋飛去飛轉八到，最尾一年單淨斯一隻飛轉來。看佢日時頭挨挨轉緊飛，暗晡頭就企在門鈴該位，等幾下日等伴毋著，叫聲緊來緊淒涼，長聲思念短聲情。一日朝晨，燕仔在寶前挨幾圈過後，當像告別，長鳴一聲，飛出去就無再過轉來咧。

過後就無燕仔來佢屋下作寶咧。三年過後，阿公正摺鳥寶劇忒，毋過，到今跡還係看現現，就像屋下个燕仔，還留在佢兜个心肝肚。

¹ 毳翼：音 pia` rhid` ；拍動雙翅。